

釋淨土羣疑論卷第六

西都千福寺大德懷感撰

問曰。爲一切衆生。求生淨土。悉得生耶。爲亦
有不得生耶。若悉得生。衆生界無窮。何因。極
樂國土。有終盡日。阿彌陀佛。有涅槃時。又華
聚菩薩。及山海慧菩薩。不應發願。若有一衆
生。生阿彌陀佛國。未盡。若我先生者。我終不
取正覺。亦不得言。衆生生盡。我最後生也。若

有不令生者。何因。五逆十惡。誹謗正法罪之
極重。而得往生。何有罪人。更過此者。不得生
也。又經言。亦令一切衆生。得生淨土。不得生
者。應非衆生。又大悲世尊。慈心普遍。何因。獨
隔一數。而不令其生耶。無限大悲。有不平等
過也。釋曰。此有二釋。一釋。一切衆生。悉令得
生。以佛大悲心。無限量等。起慈心。咸與利益。
弘誓大願。不簡怨親。故一切有情。無不生也。

若爾前所設難。復云何通答。雖盡今生。而衆生志願種種差別。或不信正法。或樂著小乘。或愛處穢方。或大悲拔苦。住茲穢土。拯救含生。或樂往生。佗餘佛國。修行供養。如是種種異行異心。不可並令俱生。極樂雖並得生。無盡生者。譬如一切衆生。皆有佛性。雖當成佛。未必盡成。如也。盡成衆生界盡。此亦如是。前義不妨。且觀一類樂生西方。機緣略盡。菩薩發願。如來滅度也。二釋亦有。不令生西方者。如經說言。應度者皆已度訖。又言。化緣既盡。遷神涅槃。以此准知。約有緣說。不據一切衆生。揔論。雖佛廣大心。盡衆生界。然其受化。唯度有緣。故往生有終盡之機。如來有滅度之日。菩薩致最後往。觀音成補處之位也。故此往生之徒。非遍一切者也。

問曰。旣言淨土无女人。如何鼓音聲王陀羅

尼經說阿彌陀佛其國號曰清泰聖王所住其城縱廣十千由旬於中充滿剎利之種父名月上轉輪聖王其母名曰殊勝妙顏子名月明奉事弟子名无垢稱智慧弟子名曰攬光神足精勤名曰大化魔王名曰无勝提婆達多名曰寂意若无女人如何有母耶釋曰今爲三釋一釋云佛有受用身變化身觀經說者是受用身鼓音聲王經說者是變化身

也。又受用身中化分段生死諸位菩薩現胎生身有父母等化變易位現化生身便无父母。二釋云此父母城邑等並是諸功德法如維摩經說智度菩薩母方便以爲父等亦以諸功德作種種人名說種種法如文殊師利於覺城東遇善財童子此覺城東還是功德名也。此亦如是以諸功德爲父母等名也。言國清泰者此顯如來最清淨法界也。性淨曰

清體寬稱。奉萬德，依止。故言國也。其城縱廣十千由旬者。此顯如來大圓鏡智也。其智具含十智能有十力。因十度成。故名十千由旬也。於中充滿刹利種者。刹利種王種也。鏡智之中有於法王，恒沙功德諸法種子。故言充滿刹利種也。父名月上者。此金剛三昧也。夫月以破闇爲能。三昧除惑爲用也。轉輪聖王者。夫金輪王尊諸乘散金剛喻定勝餘三昧

也。殊勝妙顏者。夫一身之中。顏面第一。六度之內。般若稱尊。般若殊勝爲大師之母也。子名月明者。佛喻於日光明第一。菩薩功德名之曰子。次稱月明也。奉事弟子名无垢稱者。此顯如來平等性智。常觀鏡智名爲奉事。不與惑俱。號無垢稱智慧。弟子名攬光者。此顯如來妙觀察智。一切諸法无不明。故曰攬光。神足弟子名大化者。此顯如來成所作智。

起身語意種種變現。故名神足。此三智也。居鏡智之後。名弟。從鏡智而生。曰子也。魔王名无勝者。此顯如來大悲功德也。佛以大悲憐愍。會識常在。生死拔苦。有情魔樂生死。故曰魔王。此大悲超二乘之悲。上故名无勝也。提婆達多名曰。寂意者。煩惱喧動。惱亂行人。論於調達。如來觀諸煩惱。卽是涅槃。故提婆達多名爲寂也。此乃約諸功德。以立父母等名。

非是淨土之中。阿彌陀佛。別有胎生。父母也。三釋云。如悲華經等說。諸佛成道於淨穢土。所現成道種種不同。或有菩薩於彼國生。修菩薩行。卽於彼國成等正覺。世界不變。名號與劫更別立。與劫亦无有異。或有菩薩於彼國土生。卽於彼國成等正覺。世界不變。名號與劫更別立。稱或有菩薩於彼國生。修菩薩行。卽於彼國成等正覺。當成佛時。世界卽變勝前世界。名

號與劫悉皆改轉。如觀音授記經中具說。或有菩薩於此世界生。已往他世界成等正覺。具如悲華經說。此並菩薩因中發願不同。故有如是差別。又如諸經中。或有菩薩童子出家成等正覺。或有菩薩納妻生子。棄捨五欲成等正覺。或有此世界生於中成道。有他世界生。他世界成道。如法華經說。如龍女於此娑婆世界。畜生道生。後往南方无垢世界。捨彼女身。卽成男子。成等正覺。又華光如來是於胎生於淨土中成等正覺。故經言佛爲王子時。棄國捨世榮。於最末後身出家成佛道。以此准知華光佛於他世界受於胎生。於淨土中成等正覺。若非胎生。寧爲王子棄國捨世榮也。今阿彌陀佛亦爾。於清泰國受彼胎生。於極樂國成等正覺也。

問曰。如舍利弗。大目連等所得五通。不越三

千大千世界如何生彼凡夫即能下至見聞神通等超過百千萬億諸佛世界以此准知往生淨土者皆是大根大行菩薩往生非是凡夫所能生也釋曰此義不定不可以穢土聖人所得五通勝於淨土凡夫類也只如北鬱單越定報千年何妨非想非非想天壽命八萬劫得有中天之者豈以天業報長不許有中天之壽淨土亦爾雖是凡夫以受生業

勝或淨土報強乘佛本願或託聖威靈或資生緣好或獲大乘妙定緣此得通勝此方聖何所怪也又五趣中陰將求受生所得業通超二乘修得神通何妨淨土眾生得通勝於此聖也故經說言聲聞獨覺无漏善根不如初心始業菩薩有漏善根

問曰未知往生西方眾生爲是分段生死爲是變易生死釋曰彼土菩薩八地已上一向

是於變易生死七地已還初果已上。或是分段。或是變易。直往三賢及十信等。皆唯分段。然壽命无量。無邊阿僧祇劫。三十二相。真金色。身虛無之身。無極之體。五通自在。微妙難思也。

問曰。淨土之中。既言無苦。未知三苦八苦之中。無何苦也。釋曰。若依小乘婆娑等說。佛身猶有三苦具足。八苦之中。猶有五苦。謂生苦。

老苦。病苦。死苦。五取蘊苦。唯無三苦。謂愛別離苦。怨憎會苦。求不得苦。以如來身。十五界是有漏。謂五根。五塵。五識。三界通有漏。及無漏。謂眼界。法界。意識界。以是有漏身故。有生等。五苦。然斷貪。瞋。癡等諸煩惱。結。無三苦也。以愛別離苦。是愛結。怨憎會苦。是恚結。求不得苦。是貪結。佛雖愍諸釋種。爲瑠璃王所誅。而非愛別離苦。調達出血。梅遮繫。孟火坑毒。

飯衆怨來集非怨憎會苦也聚落乞食空鉢而歸遇飢饉世乞求不得雖屬此事非求不得苦也大乘之中以佛世尊五蘊十二處十八界皆是无漏故涅槃經云諸佛所師所謂法也以法常故諸佛亦常又言捨无常色獲得常色受想行識亦復如是維摩經言佛身无漏諸漏已盡如是等諸大乘經減言佛身唯是无漏三苦八苦唯是有漏故諸佛身无

諸苦也十地已還凡夫已上有二釋一釋云三苦之中有行苦壞苦八苦之中有一苦謂五取蘊苦以十地已還由受有漏變易分段諸報身故又於行苦有漏遷流是行苦也諸有漏樂生時樂住時樂壞時苦故有壞苦也彼无逼迫身心憂苦唯无苦苦也初受彼身雖名為生非衆苦所依又无胎藏逼迫无生苦命極長遠无量无邊阿僧祇劫縱令凡夫

還入變易生死究竟成佛无死苦捨彼命願
生穢土救苦衆生雖死非苦也以心忻樂願
捨報修慈悲故此五蘊報從惑所生體是有
漏卽五取蘊苦也淨佛國土四大安穩无病
苦形无衰損无老苦勝友恒集无愛別離苦
惡人不生无怨憎會苦資緣无乏无求不得
苦二釋云極樂世界八苦同前三苦之中唯
有行苦由受分段變易報故雖有樂受以唯

清淨常恒相續无有間斷究竟永證寂滅之
樂雖有少息而不生苦非壞苦也故彼淨土
言无苦者无苦苦壞苦也問曰旣彼淨土雖
无苦苦等而猶有彼行苦等如何得名爲極
樂也釋曰三苦之中唯有一苦八苦之內亦
唯有一苦旣三_中无_二八_中闕_七唯雖有餘
一不名有苦如涅槃經言如河少水亦名无
水如食少鹽亦名无鹽又如毗曇言大海一

滯須彌一塵不可說言有山海也今此亦介
縱有少苦不妨得名爲極樂也又逼迫不安
在身在心名爲憂苦彼土俱無名爲極樂也
問曰觀經言分身化阿彌陀佛化觀世音大
勢至集極樂世界度苦衆生彼土既云極樂
卽應無苦衆生何因乃言集極樂國度苦衆
生耶又曰今言度苦衆生者爲度自土苦衆
生爲度他土苦衆生耶答通度自他土苦衆

生問曰自土既無苦衆生云何度自土苦衆
生他土雖有苦衆生應須往彼度苦何因乃
集極樂遠度他方苦耶答自國衆生雖無苦
然有二種生死分段變易有漏有爲行苦之
苦如來同集爲說妙法令速出離二種生死
成就法身故名度苦他國衆生或宜身往親
自救拔故分身佛遍滿十方如此土衆生淨
土業成臨命終化佛來迎往彼或宜歸還遠

爲利益故集本國遙拯沈淪或言度苦衆生
化佛集自土中化諸菩薩令興大悲心捨自
土樂遣生他方行大悲行教化十方有緣衆
生故言集極樂國度苦衆生如經論言八地
菩薩由多寂證真如理不肯出定教化衆生
諸佛摩頂勸令出定教化衆生卽其義也故
維摩經言此土菩薩於諸衆生大悲堅固又
言是人乃能捨清淨土而來樂此多怨害處

問曰阿彌陀經言其國衆生无有衆苦但受
諸樂未知八識之中幾有識種而與樂受相
應乎釋曰八識之中七八兩識一類相續緣
境微細難可了知縱處阿鼻地獄極苦之處
縱生三禪極樂之處而此兩識唯與捨受相
應乃至佛果大圓鏡智平等性智相應淨識
亦唯恒與捨受相應以此准知極樂世界此
七八識恒與捨受相應也餘六轉識與三受

相應謂喜樂捨在意與喜樂受相應在五識
與樂受相應捨受通與一切相應以稱讚淨
土經言无有一切身心憂苦唯有无量清淨
喜樂是故名爲極樂世界以此准知淨土六
識之中但无憂苦无妨有捨以諸喜樂心後
至歇滅位多皆與彼捨受相應又彼捨受體
非逼迫善業所感故得與彼捨受相應又彼
衆生起未至定及與中間禪第四靜慮已上

諸定如何不許與捨受相應以此准知雖名
極樂亦得與其捨受相應也若謂不然彼亦
不得與喜相應以彼土名極樂界故雖土名
極樂而得與喜相應何妨名極樂亦與捨受
相應也

問曰分段生死大智度論文等言受蟲身肉
身大品經言阿鞞跋致菩薩身中无八萬戶
蟲彼既有分段生死故須有蟲身也若有者

阿彌陀經言彼佛國土无三惡趣彼云何有
八萬戶蟲進退相違如何解釋釋曰淨土衆
生雖受分段而无有彼八萬戶蟲大智度論
及小品經說是蟲身據穢土說且就穢土色
界諸天雖是凡夫身中尚无八萬戶蟲及三
災起壞劫時末先壞三惡趣爾時人所受
於身猶自无有八萬戶蟲以三惡趣先已壞
盡何況淨土清淨妙色身雖是分段而无有
是諸蟲身也

問曰何故稱讚淨土經說西方去此世界過
百千俱胝那由多佛土此即四遠之中是於
處遠觀經乃言阿彌陀佛去此不遠二文相
違請辨其義釋曰案楞嚴之邦去此世界百
千俱胝那由多佛土誠爲處遠今言不遠自
有別義聊陳十釋以會斯文一佛力不遠二
方便不遠三應現不遠四自心不遠五守護

不遠。六有緣不遠。七本願不遠。八來迎不遠。九往生不遠。十不放逸不遠。一佛力者。經言以佛力故。當得見彼。二方便者。經言有異方便。令汝得見。三應現者。經言阿彌陀佛住立空中。四自心者。經言是心作佛。是心是佛。五守護者。經言常來至彼行人之所。六有緣者。經言有緣衆生。皆悉得見。七本願者。經言宿願力故。有憶想者。必得成就。八來迎者。經言

與諸化佛來迎行人。九往生者。經言如彈指頃。卽生彼國。十不放逸者。如涅槃經第三十卷云。夫放逸者。雖得近佛。及佛弟子。猶名爲遠。今但能專心。不行放逸。卽名近佛。不名遠也。以具斯十義。名不遠也。

問曰。觀經言是心作佛。是心是佛。諸佛正遍知海。從心想生。云何是心。卽能作佛也。釋曰。案唯識之理。心外无別法。萬法萬相。皆是自

心故起信論言心生諸法生心滅諸法滅維摩經言隨其心淨卽佛土淨又言心垢故衆生垢心淨故衆生淨故知萬法皆心變現當用此心觀彼佛時阿彌陀佛爲本性相衆生觀心緣彼如來不能心外見佛真相當觀心變作影像相是影像相名曰相分能觀之心是於見分見相兩分皆不離於自證分見分之力能現相分故名是心作佛也此相分卽

是自證分心无別有體故名是心是佛欲觀如來一切功德皆用自心所變影像故名諸佛正遍知海從心想生也或由心想修種種行爲萬德因名正遍知海從心想生故賢護經第二初言菩薩亦爾一心善思見諸如來見已卽住住已問義解釋歡喜卽能思惟今此佛者從何所來而我是身復從何出觀彼如來竟无來處及以去處我身亦爾本无出

處豈有轉還被復應作如是思惟今此三界
唯心是心有佛何以故隨彼心念違自見心
今我從心見佛我心作佛我心是佛我心是
如來我心是我身我心見佛心不知心心不
見心華嚴亦言心如工畫師畫種種五陰一
切世間中无法而不造如心佛亦爾如佛衆
生然心佛及衆生此三无差別心有垢位名
曰衆生心純淨時名曰爲佛卽其義也

問曰觀經言若見眉間白毫者八萬四千相
自然當見云何得見无見頂相釋曰有釋者
言此无見頂相旣名无見頂實不可見然言
見八萬四千相者此實除无見頂相但見餘
八萬三千九百九十九相以少從多摠名爲
見其實不見斯一相也不爾名義遂卽相違
如須弥被焚唯一塵在大海將竭唯一滴在
不可說言有山海在此亦如是摠觀諸相皆

悉周遍唯此一相不可觀見不可說言不觀
諸相有釋言此相雖復不同諸相多分不見
名无見頂相佛威神力加被衆生於觀行中
還復得見然他受用身變化身等從首至足
皆爲物現今得瞻仰利益有情他既不見卽
无利益何得名爲他受用身卽應此之一相
非他受用爲顯此相殊勝第一令物尊重多
不得見故名无見頂相復爲衆生現斯衆相
其義卽令一切衆生觀見此相

問曰如觀經第九觀中本欲觀阿彌陀佛身
相光明計作觀成只合觀見阿彌陀佛何因
見阿彌陀佛乃更得見十方諸佛耶釋曰此
有三義得見十方諸佛一由諸佛功德悉皆
同等皆有自利利他化益平等故觀一佛卽

見十方諸佛故。文殊般若說一行三昧云。能於一佛念念相續。卽是念中能見過去未來。現在諸佛。何以故。念一佛功德無量。無邊亦與無量諸佛功德無二。不思議佛法等。無差別。皆乘一如。成最正覺。悉具無量功德。辨才。二釋以見一佛。得念佛三昧。除障滅罪。故能通見十方佛也。三釋阿彌陀佛光明遍照十方世界。因光得見十方佛也。般舟三昧經說。

政。陀和菩薩請釋迦牟尼佛言。未來衆生云何得見十方諸佛。佛教念念阿彌陀佛。卽見十方一切諸佛。以此佛特與娑婆衆生有緣。先於此佛專心稱念。三昧易成。除障滅罪。光明遍照。見十方佛也。

問曰。觀經言作此觀者。生諸佛前。何因觀阿彌陀佛。願生西方。只應言生阿彌陀佛前。而乃說言生諸佛前也。釋曰。此有四釋。一釋言

作此第九真身觀時非直見阿彌陀佛亦見十方一切諸佛是故非直生極樂國亦得隨願通生諸佛國故言生諸佛前一釋云雖見十方諸佛然作此觀本擬往生西方如何通生諸佛國也而言諸佛前者以此觀勝行者得生西方之時非直見阿彌陀佛卽見十方一切諸佛故言生諸佛前三釋言此阿彌陀佛雖是一身國中化佛其數无量行者初生

之時化佛雲集皆來摩頂爲其說法化佛非一故言生諸佛前四釋言阿彌陀佛雖現一身而此一身多佛同變相雖是一其體實多以下多諸佛於一衆生皆悉有緣並悉共變阿彌陀佛同在一處猶如多盞燈光光各別不相障礙似同一光佛身亦爾諸一一佛各變一身雖似一身其實多身雖生一佛前卽名生諸佛前也

問曰。法華經言。假使滿世間。皆如舍利弗。盡思共度量。不能測佛智。斯卽凡夫二乘。无能測佛之智。又論文說。地度人度。根度諸他心。智不得相緣。如何。觀經言。若見佛身。卽見佛心。佛心者。慈悲心是。有經言。獼猴獻蜜。亦知佛心。又有經言。大目犍連。以他心智。觀佛心念。阿難爲侍者。猶如日出東方。照於西壁。前經言。不能測佛智。後經說。能觀佛心。二經既

殊。若爲通釋也。釋曰。薩婆多部釋。此義言。佛有二種心。一曾得心。二未曾得心。佛若起。未曾得心。舍利弗等。盡思度量。不能得知。若起曾得心。乃至獼猴等。亦知佛心。解深密經。佛自釋言。佛見分心。十地菩薩等。所不能知。起相分心。一切凡夫。悉皆知也。今言。亦見佛心者。是見相分心也。經言。佛心者。大慈悲是也。然佛有緣理內證智心。有緣事外觀衆生心。

如緣理內證智心是自證分心。佛佛相知。十地不測緣。事外觀衆生心。見分心。亦佛佛相知。十地不測緣。理及事外觀衆生相分心。如來加被。乃至猕猴亦知佛心也。

問曰。九品生人。依何位地。以分九品。釋曰。麤分九品。有於二家。細分九品。乃有多說。言二家者。一釋此之九品。並是十信菩薩。約住約退。造善造惡。昇降不同。分成九品。初三品人。

是十信不退住本位。人行有淺深。成上三品。中三品人。退大乘心。發小乘意。退大乘行。修小乘業。行有淺深。成中三品。下三品人。退大乘心。起生死心。退大乘行。造生死罪。罪有重輕。成下三品。二釋言發大菩提心。修行菩薩行。行有淺深。成上三品。發小菩提心。修行聲聞行。行有淺深。成中三品。不發大小二乘心。不修大小二乘行。唯起生死心。唯造生死罪。

造罪有重輕成下三品此卽麤分九品也。細分九品者且上品三人諸師取捨有多同異。一師言上品上生四五六地菩薩上品中生初二三地菩薩上品下生地前三十心菩薩一師言上品上生十迴向上品中生十行上品下生十住一師言上品上生地前三十心上品中生十信末心上品下生十信初心一師言上品上生十行十迴向上品中生十住

上品下生十信一師言上品上生十住初心上品中生十信後位上品下生十信初位一師言上品上生取十信及十信前能發三心能修三行悉名上品上生上品中生上品下生唯取十信已前發菩提心修善凡夫起行淺深以分二品所以諸師判此三品高下不同者以无生法忍經論判位或下或上仁王般若說无生法忍在七八九地諸論之中說

无生法忍在於初地。或在忍位。菩薩本業璣
珞經說无生法忍在十住位。華嚴經說无生
法忍在十信位。占察經說无生法忍在十信
前。凡夫位故。諸師各據一位得无生法忍。分
上三品。高下不同也。中三品。中一師云。中品
上生是三果人。中品中生是七方便人。中品
下生人是種解脫分善根人。一師云。中品上
生忍位人。中品中生頂位人。中品下生煇位

人。一師云。中品上生煇頂忍位人。中品中生
前三解脫分善根人。中品下生曾種解脫分
善根人。一師云。中三品人。並是種解脫分善
根人。只由持戒得有淺深及不持戒人。但行
世善。以分三品。不約位地。上下分成三品也。
下三品人。只由遇緣造罪多少輕重不同。分
成下三品。无別位地也。无生忍有六位。一聞
慧在十信前。二生勝解在十信後。三思慧在

十住後。四修慧。在煖後。五證得。在初地。六相續。在八地。此在因中。佛果圓滿。

問曰。未知往生。皆得不退。何故。上品中生。言經七日。應時。卽於阿耨多羅三藐三菩提。得不退轉。釋曰。此上品中生。人十信五心已前。人十信第六心。名不退心。生經七日。得彼第六不退之心。故名於菩提。得不退轉。初往生時。卽名不退者。此約處不退說。此兩經文各

據一義不相違也。

問曰。何因九品往生。皆於阿彌陀佛乘。其本願來迎行人。生佛國土。唯中品下生。不言聖衆來迎。有何意也。釋曰。准依四十八大誓願。若不來迎。不取正覺。又下品三生。猶得聖來。准上准下。必應聖迎。然不述者。或是翻譯者。脫或是略。而不述。有釋中品三人。佛以大慈大悲。臨終之時。而來迎接。非是本願故。中品

下生者佛不來迎。非是經文脫也。以四十八
弘誓願中說。設我得佛。十方衆生發菩提心。
修諸功德。至心發願。欲生我國。臨命終時。假
令不與大衆現。其人前者不取正覺。此願中
既言發菩提心。修諸功德。不與大衆現。其人
前者不取正覺。此發菩提心言是發无上大
菩提心。此中品等三人。猶未發无上菩提心。
但是修諸功德。願欲生者。雖得往生。佛不來

迎。不違本願。以不發菩提心。非是當於大誓
願也。藥師經中說。八菩薩示其道路。令生西
方。此即佛不來迎。佛若來迎。佛自引去。得去
西方。何須藥師瑠璃光佛遣八菩薩示其道
路也。故知无佛所以佛不來迎者。亦是不違
本誓願。以彼人先雖修道。以非專心決定。故
不是至心發願。欲生彼國。故藥師經言而未
定者。若是至心發願。即非不定之人也。又彼

經所明之行當此中品三人非當本願也又菩薩處胎經說衆生作西方業多分不得生於西方生於懈慢國中者此非是專修西方之業至心發願之人以行業不專發願不至不當本願故不來迎佛若來迎即是西方淨土業成豈容佛迎而生懈慢國也爲无量壽經說三輩人皆發无上菩提之心悉得佛迎縱令不見猶當夢見而得往生也

問曰何故觀經說下品上生至心稱佛滅五十億劫生死之罪下品中生聞佛功德下品下生稱彼佛名俱滅八十億劫生死之罪何爲同念一佛功德不殊滅彼罪懃少多有異也釋曰此有二意一釋言一念佛功德齊理應滅罪无別但以三品罪人惡業有其多少下品上生罪少唯有五十億劫之罪障生西方下二品人罪漸多故有八十億劫等罪爲

彼罪有階降說滅多少不同非是念佛功德殊令其滅罪差別譬如壯士有力能負八斗之米有人唯有五斗遣彼壯士持行非壯者不能多擊只是米元五斗此義亦爾下品上生唯有五十億劫之罪佛隨彼罪多少言滅五十億劫下品中生罪重前品三十億劫隨其罪障言滅八十億劫下品下生其罪最重故令具足十念稱阿彌陀佛於念念中滅八

十億劫生死之罪故此三品說滅罪殊非是念佛功德有差別也二釋言念佛名號雖復不殊由念佛心至誠差別故令滅罪多少不同下品上生罪業輕薄死無惡相怖心不極雖至誠念佛但能滅彼五十億劫生死之罪下品中生地獄猛火一時俱至罪人恐怖念佛至誠由心徹到滅除八十億劫重罪問若然者下品下生恐怖最重應言念佛更滅多

億何故同前八十億劫。答行者命終時其氣力虛微盡力至誠只至於此力有分齊豈能多耶。以罪既多障生淨土令具十念滅罪方同。始得往生清淨佛土譬如神劍能斬大木如其多用力人木卽深如不多用力斬木便淺非劍有利鈍蓋人力之強弱不同此亦是佛之功德雖復无差別然其念者至誠有異故令滅罪多少不同也。

問曰何因聞十二部經首題名字只滅千劫重罪念佛一聲乃滅五十億劫重罪般若云聞經不逆勝供養八百四十萬億那由他諸佛也釋曰彼經供養佛是好時然供養佛是有相心供養功德少持經是惡時作无相心持經功德多也今此聞經念佛同是惡時悉但有相然與阿彌陀佛宿舊緣熟惡世稱佛生信極難佛能弘經是以稱佛滅罪多彼聞

經也

問曰：下品下生人，罪雖多，下品中生，五逆謫法，何因下品中生，但聞佛功德，即得往生，下品下生，乃須具足十念，稱阿彌陀佛，方生淨土耶？釋曰：有二釋。一、言計五逆等，僦只合六劫受罪，然有九八十億劫罪者，以此人造茲重罪，長養過去諸餘業，皆令有力，能招九八十億劫生死之報。如一念瞋心，現前能燒一

切善法，能障百千法門也。此亦如是，造此重罪，能增過去惡業，皆有力勢，能感惡報，障生淨土也。二釋此五逆罪，唯感五劫受苦，然謫法罪，經說受苦劫數長速，如大品經及佛藏經說謫法人墮此阿鼻地獄，此間劫壞更生，他方地獄中，如是展轉，經無數劫，故須十聲稱佛，滅八十億劫重罪，得生淨土也。

問曰：何意往生法門，非唯一法，垂終之日，編

令念佛不教餘善有何義耶釋曰命終之人偏教念佛以此七義勝不教餘法七義者何一勝二少三易四滅五緣六迎七生一言勝者一切凡聖若人若法無過於佛最尊最勝二障斷盡萬德周圓自覺覺他覺行窮滿悲愍衆生過踰一子是諸有情大歸依處爲洲爲渚是救是歸故須至誠稱念佛二少者諸修善中唯此念佛言辭最少餘諸法門悉皆

多也臨終之日命在斯須豈能更修餘多法也三易者於諸修行法門之中唯此念佛最易修習將終之際百苦纏身氣力衰微萬事俱捨勸令念佛猶恐不成更說餘門誠難習學簡斯易法教彼令修也四滅者此專念佛言約易修一念至誠卽能滅八十億劫生死重僣永絕娑婆三途苦報也五緣者阿彌陀佛曠遠劫已來共衆生結緣極重有於供養

見聞隨喜同行等緣乘此宿因一心稱念尋聲則救永絕五燒也六迎者以念佛罪垢滅除阿彌陀佛乘本誓願與諸聖衆親自來迎餘法不然故須念佛也七生者如彼願言乃至十念若不生者不取正覺也以斯七義勝諸法門故勸衆生終時念佛也

問曰一念十念阿彌陀佛得生西方爲是唯用此念佛而得往生爲更藉餘法門方得生

耶若唯取此念者未解此念經雖說言卽是具足无上功德如何一念卽成无上功德也釋曰功德无量豈要須藉長時多修方成无量也自有長時多修而是少福自有少時少修而是多福其義如何如金剛般若言初日分中日分後日分各各以恆河沙等身命布施如是无量百千萬億劫以身布施若復有人聞此經典信心不逆其福勝彼等无量百

千萬億劫時長也捨恒河沙等身修多也一
一皆害其命苦多也雖復具有三多而其福
少若復有人身少也聞此經典時少也信心
不通行少也而得功德過逾前福此是上聖
校量非是下凡測度豈不信也今此一念念
佛卽是具无上功德亦是大師真語何得懷
疑也又以一念念佛卽過百千萬億劫修道
故成功德多也如法華經說若復有人受持

六十二億恒河沙菩薩名字復盡形供養飲
食衣服臥具醫藥於汝意云何是善男子善
女人功德多不無盡意言甚多世尊佛言若
有人受持觀世音菩薩名號乃至一時禮拜
供養是二人福正等無異若受持六十二億
恒河沙菩薩名號復供養四事計用時節已
經百千萬億劫始爾暫時稱觀世音菩薩名
號供養一種此多時功德同於少時之福十

輪經說若人於百大劫至心念觀世音菩薩等不如一食頃念地藏菩薩若百大劫念觀世音菩薩況前校量卽當過百千萬億不可說恒河沙菩薩名號供養也若多劫中念地藏菩薩不如一聲至心念阿彌陀佛功德无量無邊也如是將佛比地藏菩薩將地藏菩薩比觀世音菩薩將觀世音菩薩比餘菩薩六十二億恒河沙等校量卽當念佛一聲功德勝無量阿僧祇恒河沙數菩薩名號供養四事此卽一念念佛卽過念餘菩薩一阿僧祇二阿僧祇劫修道如何念佛而功德少耶可須以此校量知多功德也

問曰若以此校量實成無量功德深合仰信歡喜稱念定得往生而法華經言若人散亂心入於塔廟中一稱南無佛皆已成佛道若一聲稱佛卽得往生西方亦一聲念佛卽得

成於佛道。若得成者。卽應十方世界。无一凡夫。悉能稱佛。皆成佛也。若一聲稱佛。未得成佛。但是成佛遠因。更須漸漸積功德。具足大悲心。萬行周圓。三祇劫滿。方成佛果者。此臨終一念十念。何必卽得往生。亦須漸漸熏修。具足諸波羅蜜。方得往生淨土。釋曰。此不成例。佛无九品差殊。悉須萬德齊備。必假長時長劫。方始道成正覺。法華經爲對聲聞之人。

作如此說。但能發无上菩提之心。乃至散亂念佛。終是佛果之因。後能廣修諸度。卽得成等正覺。聲聞縱多修道不趣无上菩提。爲此不能成无上果也。彼經爲對聲聞會。二歸一故作是說。不例觀經等往生義也。一聲十聲念佛功德。雖得往生淨土。還是凡夫衆生往生。九品不同。許其行有多少。還是凡夫所攝。何妨一念卽生佛土。若无九品差別。爲因皆

須一種必須具修萬行方成十方世雄故不可爲例也

釋淨土羣疑論卷第六終

